

DEO OPTIMO MAX.

UNI ET TRINO,

VIRGINI DEI-PARÆ, ET S. LUÇÆ,
Orthodoxorum Medicorum Patrono.

QUÆSTIO MEDICA,

CARDINALITIIS DISPUTATIONIBUS,
*manè discutienda in Scholis Medicorum, die Martis trigesimâ mensis
Martii, anno Domini M. DCC. LXXIII.*

PRÆSIDE,

M. JOANN. FRANC. CLEMENTE MORAND, Equite, Doctore
Medico, in Regiâ Invalidorum Domo, Medici Coadjutore, Regiæ
Scientiarum Academiæ Parisiensis Socio ordinario, in iis etiam quæ
Lugduni, Rothomagi, Londini, Florentiæ, Holmiæ, Harlemii,
vigent, Consociato; Regii Medicorum Nanceianorum Collegii Socio
Honorario; apud Leodienses, civitatis jure donato, necnon Collégi
Medici Assessore Honorario.

VICES GERENTE,

M. JOSEPHI-MARIÆ-FRANCISCI LASSONE,
Regis in Sacro Consistorio Consilarii, Serenissimæ Delphinæ, Medici Pri-
marii, Regiæ Scientiarum Academiæ Parisiens. necnon Regii Medicorum Nan-
ceianorum Collegii Socii.

An qui humidioribus vescuntur diutius vivunt? ()*



ITA est succi nutritii ad omnes corporis animati particulas appli-
catio, quâ reparatis humidi nativi jacturis, illarum structura,
positus, consensus & tactio conservantur. Communis est tantum
plantis & animalibus; in illis paucis organis indiget, in his multi-
plici partium apparatu continetur. Ejus cursus insigni temperamenti
mutatione seu ætatum vicissitudine distinguitur. Ab infirmâ puerilis
mollitiæ ducit initium, & aridâ senectute clauditur, florentis fervore incitatur,

(*) Author M. Anthonio-Jean de Morand, anno 1684.

constantis gravitate nunquam retardatus insitit, semperque velocissimus fatales ad metas properat; ad quas quaecumque nascuntur & vivunt, fatali ac necessariâ lege quadam ocius, alia ferius voluntur. Sic cedro, palmæ, cupresso, vita multis invicta seculis durat; ophioglossò, Ephemero & parvulo insecto quod hemerobium inde vocant, intra diei spatium dissolvitur; sic elephanto, camelo, Aquilæ cygno centum in annos prorogatur, cum papilionibus paucos in menses excurrat. Homines inter quos gracilibus quadratos, graciles obesos, pinguesque macilentis vitæ longinquitate præstare observatur; à stirpibus quidem aliquot longævitate superantur; nisi cornicum, cervorum & similibus commentis temerè fides adhibeatur, animalium vivacissimis non inferiores habendi sunt. Quando quidem ubicumque terrarum non paucos vivere centum annos & amplius experientia comprobatur. Quis vero sit præfinitus vitæ humanæ terminus, tam ignotum est ac incertum, quam huic accelerare vel remorari omnibus integrum esse patet.

I I.

UT non modo stirpium ac brutarum animantium, sed etiam hominum vita in corporis partium alimentum deferentium admittentium ve commercio & actione versatur, ejus conservatio potissimum à spiritu seu calore illis infuso dependet; qui est tenuis, æthereus, perennique motu acta materia sanguinis vapori purissimo permixta. Is dum arteriarum ductu cum sanguine in membra vestus appellit, vitalis & influentis nomine donatur, ac insiti cum inhaeret partibus; quando muscutorum artuumque molem agitat, inservitque sensibus, animalis appellatur; quamdiu multo humido repletus succos attenuat, coquit & ad alendum aptos reddit, naturalis dicitur, igneus vero febrilique si hos incendit atque consumit. Cum natura sit mobilis atque fugax, citius evolveret, nisi lento humore tanquam vinculis astrictis retineretur; qui si aquosus est, ea orem exinguit; si redundat, opprimit; si paucus, resolvitur; si exiguo calore perfunditur, frigoris vim non sustinet. Nec vita multos in annos producit, nisi partium affabrè concinnatarum firma compages, quæ diu functionibus obeundis non impar sit, conjungatur cum humido copioso & pingui, quod neque frigore profligetur, & quod eâ proportionem cum calore temperetur, ut neutrius dominium excitatâ seditione contingat. Cum enim jugi motu attritæ partes & siccitate contractæ alimentum excipere non valent, fatiscunt, & agere cessant; ita ut senescere idem sit ac arefcere, morisque sit omnis motus ab humidi consumptione privatio.

I I I.

QUI mortem industriâ humanâ vitari posse, Ptolomæum imitati regem, insulse credunt, tam cæci sunt quam qui hanc intemperantiâ maturari, & rectè insititâ vivendi ratione, plus vel minus pro corporis temperamento & compositione retardari non vident. Quippe homo non tantum ut in lucem editus est, statim exterarum fortuitarumque causarum impressionibus nudus obicitur, quarum vi sæpe frangitur, & violentâ morte dicitur occumbere, sed occultis etiam domesticorum hostium insidiis opportunissimus est: sicut enim in ferro rubigo, & cossi terebinesque in ligno pestes ingentæ latent, sic ab ortu morborum lethique semina in se fovet, à quibus immaturo interitu rapitur. Immo dum calor vitæ ipsius author proprium humidum sensim exhaurit, tabescit & fato naturali occidit. Ejus corporis adeo fluxa est dissolubilisque coagmentatio, ut intra breve

spatium (quod raro ultra septem dies proferri potest) labefactaretur, nisi quod continenter dilabatur nutritio reponeret, & novâ in locum effluentis sufficîa materiâ ruinas refarciret. Quæ si uberior ad partes vel molles vel solidas accedit quàm decedat, statura vel crassitudo corporis augeſcunt; non tamen ad mortem usque, quod de crocodilo ferunt, sed tantum ad senectutem, quâ cum nimis partes jam induruerint, crescere quidem desinunt, non vero nutriri, nec vivere, nisi quando viscera, vel quælibet communibus vitæ muniis addita organa, ut in piscibus branchiæ ac in perfectis animalibus pulmones ob nutrimenti penuriam arida solito ab opere conquiescunt. Quid autem est ad partes exsuccas & siccitate rigidas emolliendas, exhaustasque reficiendas humidiori alimento potentius? Cui corpus magis quam ipsi semini debet, ut pote cui non tantum incrementum, robur, functiones, perfectionemque, sed illorum omnium diuturnitatem accepta refert. Est enim corporis viventis materiæ tam familiare tamque simile ut in deperditæ locum substituatur, quæ cum sit humida, solida & ætherea, potu, cibo & aere integranda fuit; quorum naturam copiam, vires usumque ad vitam diu tuendam potissimum conferre minime dubium est.

I V.

CUILIBET vitæ diu prorogandæ student, non modo quod spiritus vel aeris ambientis calore vel motu per os & nares exhalatur, atque per totius corporis meatus & spiracula indefinenter effugit restituendum est, sed etiam partium compositio temperatioque conservandæ sunt, necnon illarum nima dissipatio prohibenda, quæ præsertim in recto humidioris vietus usu versantur. Si quidem non alio consilio ad capeſcendum alimentum siti & fame natura nos extimulat, quam ut esculenta potulentis esse miscenda & siccior emeam liquidis emolliendam atque diluendam esse admoneat: cumque ipsa humidissimum lac fugendum infantibus exhibet, humidior em alimoniam cæteris omnibus præferre videtur. Cibis enim solus ille qui multo imbutus est humore, alioquin insuperabilis, in chylum facile convertitur ac undique distribuitur. Est contra prorsus ad alendum inutilis priusque fuerit in corporis penetralibus liquefactus, multoties attenuatus atque fusus. Nec si crassus esset ac fæculentus, posset unquam per artissimas nervorum, membranarum, fibrarum, cartilaginum & ossium angustias penetrare. Sed neutiquam liquidum esse juvaret, si fervidus, vel salus, vel acer existeret, si quidem murriæ vel aquæ stygiæ aut ferventis instar quæ nihilo secius exsiccant & urunt etsi dissolvant, totius corporis humidum, serpente ob tenuitatem longius laticisque labe, potius vastaret quàm repararet. Sic partes omnes genio defraudatæ brevi & ante diem exhaustæ marcescerent, nisi uberibus alimenti humidioris laticibus rigarentur, quibus non tantum earum detrimentum instauratur, earumque structura & humidum adversus calorem prædonem ejus perpetuum muniumtur, sed etiam ipse calor fundi proprii fatalis ac necessarius decoctor ita temperatur, ut sensum factus ex acri lenis, ex rapido placidus, & consumptore beneficus, non possit sua bona nisi lentè & longo tractu temporis disperdere.

V.

NON minus ad longævitatem mollioribus humidioribusque nutriri cibus, quàm gratis consueto, simplicibus, temperatis, corporisque materiæ quam similis expedit, licetque sicciores aliquando humoribus dissolutis corpore instructis

non officiant, quales fuere forsân quos à cibo & potu, glirium instar, suo succo vi-
ventes diu abstinuissè narrant, cæteris maxime nocere constat, & iis omnibus, ut
etiam animalibus quæ *φωλιεύουσι* dicuntur, exiguum semper ævum fuisse comper-
tum est. At victus humidior quem ad modum lac universis puellulis competit, om-
nibus hominibus quocumque temperamento præditis vel etiam, cum servemur
similibus, ipsis humidis, modo prudenter adhibeatur, convenientissimus est. Si
quis ergo benè natus est, robusto nempe ac bene temperato corpore instructus,
& cibus vescitur per se vel per solius aquæ, aut vino pauculo permixtæ potum
humidioribus, boni succi, nullâque vi præpollente donatis, ut carne caponum
pullorum, perdicum, vituli, bovis, jusculis ex eâ paratis, ovis ac pane filigi-
neo recentibus & similibus non ut abdomini sed ut necessitati serviat, modo
præterea liberam puram & æquabilem ducat animam, somno & quiete ad re-
creandas non ad frangendas vires utatur, ad excitandum non ad dissipandum
calorem vigilet & exerceatur, non sinat perturbationibus animum vehementius
commoveri, corpusque blandioribus voluptatibus dissolvi, curetque tandem ut
fordibus abstentis ubique niteat, à vanâ climâericorum annorum, cometarum,
astrorumque defectionum (quæ sunt plebis imperitæ terricula) pernicio tutus
feliciter vivet recteque spretis arcanis ex auro gemmis, cervorum serpentumque
carnibus inani molitione concinnatis liquoribus, qui sunt stultæ credulitatis par-
tus, debitum longiori vitæ cursum absolvet. Qui contrâ licet firmis vitæ funda-
mentis nitatur, se in omne libidinum genus præcipientem & effrænatum effundit,
exercitationibus, vigiliis, curis, jejuniisque se macerat, calidioribus, sicciori-
busque opsoniis, condimentis, fassamentis, & similibus infarcit, seque mero,
chocolatâ caphe, the & hujusmodi sitis irritamentis, quorum cautior usus pro-
desse posset, intemperantiùs replet; non secus ac arbor quæ cum aquâ calidâ diu-
tius resperla maduerit, quamvis ad tempus lætius adolescere videatur brevi tamèn
arescit, cum fuerit aliquandiu ad actiones expeditior & promptior propediem
tabidus ruit, & immaturâ morte conficitur.

Ergò qui humidioribus vescuntur diutius vivunt.

Proponēbat Parisiis JOANNES-JACOBUS DELAPORTE, Parisinus, Doctor
Medicus Montpellierensis, necnon Saluberrimæ Facultatis Medicinæ Parisiensis
Baccalaureus, A. R. S. H. 1773, à sextâ ad meridiem.